



*Premiers sacrifices qui furent offerts par Aaron le grand Prestre, selon l'ordonnance de Dieu, sur lesquels sa gloire apparut, & le feu du Ciel les consuma.*

**M**OYSE appella Aaron & ses fils, & les anciens d'Israël, puis il dist à Aaron : Prens du troupeau vn veau pour le peché, & vn mouton pour l'holocauste, les deux estans sans macule, & les presente deuant le Seigneur, & parleras aux enfans d'Israël. Prenez vn bouc pour le peché, & vn veau & vn agneau d'vn an qui soient sans macule, pour l'holocauste ; & vn bœuf, & vn mouton, pour le sacrifice des pacifiques, & les sacrifiez deuant le Seigneur, en offrant au sacrifice d'vn chacun la fleur de farine arrosée d'huile ; car aujourd'huy le Seigneur vous apparoitra. Adonc ils apporterent toutes les choses que Moyse auoit commandées, deuant le Tabernacle où estoit toute la congregation. Et lors Aaron s'approchant de l'Autel avec ses fils, sacrifia ainsi que Moyse auoit ordonné : & estendant sa main vers le peuple, il le benist ; & ayant acheué de faire oblation pour le peché, l'holocauste, & les sacrifices pacifiques, il descendit. Et Moyse & Aaron estans entrez au Tabernacle de tesmoignage, & puis sortis, ils benirent le peuple, auquel la gloire du Seigneur apparut. Et voicy le feu sorty de la face du Seigneur, consuma l'holocauste, & les graisses qui estoient sur l'Autel. Ce que voyant tout le peuple il loüa le Seigneur, se prosternant sur sa face.